

南宋文录

一
函
六
册
函

南宋文錄錄卷九目

頌

炭頌

范成大

廣西經略顯謨趙公德政頌

張茂良

於越九頌

諸葛興

鐵城頌

黃應德

贊

山陰圖贊

葉夢得

陸宣公像贊

程俱

呂伯恭畫像贊

朱子

贊文公朱先生像

陳宓

贊勉齋黃先生像

陳宓

文信國畫像贊

劉辰翁

文丞相像贊

鄧剡

碑

章貢紀功碑

朱翌

東坡先生祠堂碑記

晁公遡

蘇文定公祠碑

韓元吉

朝請郎將作監丞歐陽公祠堂碑

陳彬

對策

精養兵

倪思

救荒政

倪思

抑奔競

倪思

策問

家塾再試策問一道

魏了翁

安溪縣試諸生策問

陳宓

南宋文錄錄卷九

吳江董兆熊元輯

頌

炭頌

范成大

余病衰大冬非附火不暖旣銘被鑪又作炭頌
燔木不灰化爲精堅是衷至陽惟火之傳雪霾六虛冰寒九淵環
堵之室天不能寒有赫神物幹流化甄尺璧寸珠罔功汗顏我惟
德之莫之名言旣燠旣安與之窮年

廣西經略顯謨趙公德政頌

張茂良

紹定四年秋有詔帥廣西趙公進直顯謨閣易鎮寶婺桂人德公
之久結戀不釋卽無量壽佛宇西偏尙像建祠寓其去思猶以爲
未足乃相與頌述善政刻之水月洞石崖此石永存德名不朽公
丞相忠定之子名崇模字履規屏翰我邦六閱歲紀政先仁恕鎮
靜不擾捐利予民恩惠周浹本端末整闔境晏清人享和平之福
形諸歌頌理則宜然頌曰

帝奠區宇粵居南土連帥之尊桂其治所始時桂人憔悴數詔
公于蕃拯其疾苦宣上恩旨滌以膏雨疏剔蝨蠹民胥蹈舞喧
歌謠謂來何暮帝曰嘉哉寬我憂顧賜璽增秩事循漢故維公之
德不茹不吐施于有政威以仁寓安民之安弗庸鉤距耘耨績
倉箱筐筥賤爾代輸屢捐帑貯環堵晏眠吏無叩戶平價發廩以
哺飢阻斂散循環邑有高庾攻堅易朽加惠鬻字有美南軒紹其
遺矩吁嗟先賢魑魅是禦揭祠烝嘗蘭藉椒醕風化所繫人心起
慕什伍其旅乃搜乃補築室萬楹蠡屯分部粵俗襁鬼妖巫貳
發摘竄席絕其根緒鄰荒民流襁負藍縷賤粟給廬于時處處櫟
斂道殣分命緇侶暇免狸蚘患及齒腐鑿石他山康莊坦步虹梁
廣濟屹若砥柱南渠可舟濬堙疏淤潭潭督府匠石斤斧麗譙凌
雲鐵甕□堵簪帶改觀水亭坡墅游刃所及百廢具舉民不知役
約已有裕江閩湖湘跳梁狗鼠踰嶺以南寂然桴鼓獫狁居種
蔓盤瓠易擾難安頰首妥附爲政以德計效如許稚耄相告公我

父母今舍我去如孩失哺我言匪私感在心旣俾熾而昌奚斯頌
魯公壽無疆受天之祐爰作聲詩磨崖江潯崖石巖巖昭示千古
修職郎新潭州善化縣主簿張茂良紀

於越九頌

并序

諸葛興

興世家會稽俯仰巖壑惟禹陵所在自少康建祠今數千載比年
時和歲豐邦人奉祀弗懈益虔因感昔人九歌之作自禹暨嗣君
二相與夫英霸賢牧高人孝女顯有祠宇者輒爲九頌效顰前作
念昔楚騷之興蓋出于感憤而繼以規諷後之摹倣者如九詠九
愁之類往往皆然興方蹈詠明時又其意主乎景仰先哲固無所
謂感諷也直曰頌云爾獨妄論古人不能不發爲一二而其歌吟
嗟歎因寓之以擬騷之聲云
瞻越山兮鏡之中鬱喬木兮岑叢倚青霞兮窆石枕碧流兮寶宮
端黻冕兮穆穆列俎豆兮雍雍梅爲梁兮挾風雨儻而來兮儻而
去芝產殿兮間見橘垂庭兮猶古璧騰輝兮珪薦瑞書金簡兮緘

石匱朝萬玉兮可想探靈文兮何祕嗟洛水兮橫流民昏墊兮隱
憂運大智兮無事錫洪範兮敘疇身勞兮五嶽迹書兮九州亶王
心兮不矜迄大海兮歌謳倚聖宋兮中興駐翠蹕兮稽城獨懷勤
兮曠代燦奎文兮日星揚舲兮拊鼓吳歆兮鄭舞奠桂酒兮蘭肴
庶幾髮鬢兮菲食卑宮之遺矩

右大禹陵

肇三聖兮傳一中建太極兮參洪濛玄圭錫兮汝績昭華歸兮汝
躬大道公兮均禪繼家天下兮繇姒氏嵩石兮發祥謳歌兮與子
誓甘野兮服叛養國老兮貴齒席不重兮味不貳琴瑟屏兮鐘鼓
置思皇訓兮克儉必敬承兮敢墜祀四百兮縣景祚兆大橫兮垂
異世越山兮蜿蜒鏡水兮漪漣煥祠宮兮屹祀肅庶祀兮愉然端
冕兮龍章執圭兮琳琅想規重兮矩疊恍韶奏兮鏗鏘

右嗣王祠

披竹簡兮典謨聖手斷兮唐虞登羣龍兮輔翼萃一堂兮都兪知
人兮帝之哲動天兮帝之德畫像兮民不犯舞干兮苗已格迨一
旅兮中興嚴廟貌兮稽陵感會遇兮風雲崇像飾兮股肱憤夷楚

兮陵上國忽庭堅兮祀俄息泚麟筆兮特書喟夷吾兮有力何汲
汲兮詭誕謂明良兮相賊奸雄託兮自焚慨齊東兮毋惑仰而觀
焉典禮秩俯而察焉艸木植功之遠兮難名民之思兮無斁

相祠

右二

睇禹陵兮巋然邃珍館兮蟪蛄做別室兮遺像崇英霸兮千年諗
越民兮非黷祀推世家兮自遷史肇無餘兮開國傳後裔兮奮起
痛夫椒兮深衄同國人兮勞欲采藪兮會何味嘗膽兮志彌篤封
以內兮種所司閩以外兮蠡所知羌厲志兮澡恥迄乘時兮決機
盟上國兮王致胙按山南兮恢土宇陟鑑臺兮睨東海矩天門兮
模地戶惜規圖兮不宏幾弓藏兮犬烹蹇七術兮遺恨悵五湖兮
遐征尙蟬嫣兮以復續終與享于鼻祖之庭

右越王廟

書畀姒兮力溝洫民奠居兮勤稼穡降嬴劉兮言水利嘉鄴渠兮
夸鄭國慨元光兮瓠子決彼劍封兮河之北悼一言兮貽時害諉
天事兮非人力昔越守兮得賢侯慮遠久兮爲民謀鏡一湖兮陂

萬頃備瀦泄兮歲有秋宜殺身兮利人抑洙泗兮稱仁嗟後來兮
私已田吾湖兮寢湮湖之復兮疇繼侯之心兮萬世酌清流兮擷
蘭芷奉明薦兮非昵祀

右馬太守廟

典午西兮金谷輩渡而東兮藹多士嘉內史兮屏浮華淡物類兮
頤天粹升治城兮遐想友東山兮雅志修禊事兮蘭亭觴曲水兮
羣英追雪風兮涵泳渺萬化兮均平紀清游兮感慨剡形忘兮神
詣蔚翔鳳兮一札寶連城兮千祀太傅起兮爲蒼生扶晉鼎兮躋
苻秦內史歸兮樂山水師萬石兮飭孫子出與處兮兩賢意易地
兮皆然

右王右軍祠

山簇簇兮環湖水淼淼兮縈紆人何游兮明鏡鳥何飛兮畫圖懷
賀老兮今昔想逸少兮林廬老之襟兮天闊老之神兮秋月飛翰
兮龍鸞吐詞兮冰雪際熙運兮開元司縉典兮春官凌玉霄兮倚
華蓋驂鸞馭兮升西崑俄清夢兮縣縣恍乘雲兮登仙覲玉皇兮
紫宸聆九奏兮鈞天賤天公兮遂志鼓千樵兮錦里吾朋兮漚鷺

吾賓兮煙水野服兮蹢躅仙衣兮娛戲緬高賢兮非苟于去就庶

幾兮東門之傳鷗夷之子

右賀監祠

虬髯起兮龍翔耀兵威兮八方法羽林兮嚴禁衛握鉤陳氏埽櫬
槍視諸將兮噲等伍咨舊臣兮忠且荃魯萬目兮矩矱衛九重兮
心旌維東南兮都會辱吾土兮鎮撫暢惠威兮千載隤福祥兮茲
土瞻衣服兮煌煌薦蕙肴兮葵觴匪震懼兮羅池亶愛思兮桐鄉
王之澤兮流後裔更累葉兮奮忠義孰旌表兮陪廟祀顯一門兮
厲斯世

右城隍廟王廟

悄叢祠兮江之湄凜余心兮肅祇裒孝行兮尙之祀垂妙辭兮瀉
之碑嗟窈窕兮踐天性一念烈兮萬古鏡山眉兮蒼蒼江練兮茫
茫江之水兮可竭娥之靈兮不可歇

右曹娥廟

鐵城頌

并序

黃應德

恭維我宋聖作明述上同堯舜代天子民無間遠邇肆我皇上家
視天下比以朝紳之議論制閩之神明皆謂夷警雲南而廣西首

當其衝旣命寶文胡公爲帥復以宜當西南夷間道特命總管雲公出守斯土爲保障計公至帥府寶文胡公授以籌邊方略設險守國以爲經久之規公奉命惟謹始入郡觀郡城之東龍江之北四面石壁環繞且襟山帶河有關中百二形勝遂間于寶文公轉問于朝得旨以幣百萬建爲鐵城其城也不資屋宇之覆蓋不勞後人之營理其堅如鐵之不可擊而破其高如天之不可階而升新舊之異殆霄壤焉外夷聞風且將褫其魄而奪之氣矣尙何幹腹之慮哉其係衛宜民實與天地相爲久長故四民同爲之頌刊諸鐵城石壁以記其無窮之績云頌曰

惟天惠民惟辟奉天惟臣承辟于蕃于宣明明天子不我遐棄親命帥臣經略西事永惟宜陽外控西夷居廣之衝實爲藩籬蠢爾遠夷謀幹我腹天子曰吁保障誰屬乃眷西顧疇咨虎臣帥臣乃言雲公其人天子曰俞保障斯土安邊立功外禦其侮公拜稽首曰往欽哉徒御嘽嘽惠然尙來自公來宜奉命悉力熟視地形設

險守國乃經乃營因山爲城石壁回環屹然天成雙流淼淼如帶
斯繞維石巖巖角立岸表諸關宏修高無與儔內容萬竈外扼咽
喉四面如鐵形勝卓絕車不得馳騎不得列牢不可破堅不可夷
雖有賁育勇無所施乃立府庫儲財積粟細柳分屯兵食俱足復
用石工鑿井于中山下出泉源源不窮重城外維下瞰淵水東西
對峙摩空五壘郡邑旣遷廨宇森嚴民居雲集接棟連檐道更坦
履其直如矢賢遷有無日中爲市猗歟我公竭心盡忠指授畫規
必親必躬賢哉長幕暨郡文學間我侪事贊籌帷幄以衛宜民民
咸賴之安堵樂業春臺熙熙夷人聞風心寒股慄屏迹而遁邊境
寧謐宜山峩峩龍水湯湯鐵城之功山高水長四民交觀磨崖刊
頌億萬斯年永戴我宋

贊

山陰圖贊

并序

葉夢得

龍眠李伯時畫許玄度王逸少謝安石支道林四人像作山陰圖

玄度超然萬物之表見于眉睫逸少藏手袖間徐行若有所觀安
石敷腴秀澤著屐返首與道林語道林羸然出其後引手出相酬
醋皆得其意俯仰步趨之間筆墨簡遠妙絕一時碧林道人梵隆
少規摹伯時爲余臨寫真僞殆不可辨更三十年世當不知有兩
伯時也贊曰

揚眉軒然意軼萬里亦將焉往而竟斯止曰遠游者以是爲游疾
走息陰彼將安休

右玄度

翰墨之娛以寓萬變不償一姥笑蔽山扇袖手縱觀我行故遲豈
以懷祖樂此透迤

右逸少

韞玉于山煒然不枯我觀此容非山澤臞卻顧何爲東山之陟如
何淮肥乃折此屐

右安石

一世所驅顛倒衣裳是身何依獨委支郎從容三人亦躡其後人
所無言聊一舉手

右道林

陸宣公像贊

程俱

陸宣公贇嘉興人建炎三年夏四月信安程俱假守秀州始訪公之像圖之資聖佛寺率僚吏祠而拜之爲贊曰
天下無事湛于宴安視此神器隱如泰山是
以其臣惟得是嗜以
諛爲恭以儉爲智世方紛亂上下岌岌忍于其間覲得患失偉哉
宣公興元之初夷險一致爲君矢謨如彼大廈載支載扶如彼赤
子以調以虞格君之非屹國之倚卒以一旅還之異方西平之功
宣公之畫外勘內籌心齊惟一構李之郊吳越所虔公生其間種
蠡汗顏顧視故國喬木蒼然豈無若人以奠九躔

呂伯恭畫像贊

朱子

栝蒼潘君叔度畫其先師東萊呂氏伯恭父之像于可菴退老堂
之上曰毋使西河之民疑我于夫子也屬其友朱熹贊之爲作詞
曰
以一身而備四氣之和以一心而涵千古之祕推其有足以尊主
而庇民出其餘足以範俗而垂世然而狀貌不逾于中人在冠不

詭于流俗迎之而不見其來隨之而莫覩其躅矧是丹青孰形心曲惟嘗見之者于此而復見之焉則不但遺編之可續而已也

贊文公朱先生像贊

陳宓

貌溫而嚴德剛而粹春融秋肅淵澄岳峙道光二程識高百氏生
遇明時進難退易天假之間斯文大備偉哉夫子垂教萬禩

贊勉齋黃先生像

陳宓

貌之癯有顏之樂氣之剛得軻之養以身任道老而益壯仰止朱門孰出其上

文信國畫像贊

劉辰翁

間居忽忽萬古咄咄天風慘然如動髮如何尋約亦念東歸豈其英爽猶累形軀同時之人能不賴泄昔忌其生今妬其死

文丞相像贊

鄧剡

目煌煌兮疎星曉寒氣英英兮晴雷殷山頭碎柱兮壁完血化碧
兮心丹嗚呼孰謂斯人不在世間

碑

章貢紀功碑

朱翌

紹興二十有二年七月二十三日東南第六將校齊述以八營四千人叛脅制者二千人附賊者又二千人皇帝命龍神衛四廂都指揮使忠州團練使李耕護殿陛之師致討詔耕曰汝善撫吾師之在外者汝皆制之立功者視汝奏加厚賞耕駐軍于獅子岡劉綱以洪州兵駐城之東南崔宜副之張宜以循州兵駐城之南郭蔚副之張訓通以鄂州兵駐于北陳敏以福建兵駐于東呼延迪副之鄧酢以宜都民兵掘水東王麻陳修年以漕屬給餉刊木輦石攻具大興上仁聖不忍誅屢下金字符賜以生路許從招撫耕遣辯者直諭禍福無自新意乃服袍誓曰聖恩等天地而羣醜罔革耕受鉞來南繼奉命守茲土其敢曠日卽殄滅之無遺種乃已諸軍其用命敏築甬道將畢十一月二十三日天未明耕促雲梯天橋徑薄東北隅神臂克敵弓交發命中巖十三梢飛石相屬

南文錄卷九
敢死士先登諸軍拔臂躍而上賊棄城巷戰耕督麾下躡之宐蔚
戒其軍毋動更嚴備以待賊敗縋西城訓通綱掘其衝半溺于江
餘轉走城南突宐衛寨士鏖擊一賊不得縱耕披灰燼瓦礫立治
所斂賊骨築京觀葬無辜爲叢冢等列功狀以聞有旨耕爲觀察
使綱等遷兩秩將士遷一秩減磨勘年有差桐鄉朱新仲屏居曲
江實鄰章貢念諸公戮力一心以克有成功因贛人之請爲書本
末刻石示後銘曰

帝御明堂蓋乾載坤子視八紘澤傾四瀛有悖于德始煩震霆章
貢迫歲何悍覆城選將殿廬推轂禁營肆檄外屯戮力合盟猛氣
斗衝怒頰鯨吞礮飛摧山橋梁殞星椎鼓一誓擎雲立登狶突厲
奔一迹不存數實轅門歌鼓轟轟崆峒之高摩天以青維茲贛人
旣乂且宐篤其忠淳永陶太平

東坡先生祠堂碑記

鼂公茆

在昔懷忠抱義之士必于歿身之所廟會百代者豈惟丕功鴻烈